

LXXIII

1327-I-12, Sepúlveda. Provisión real de Alfonso XI al concejo de Murcia, prohibiendo el pase de bienes realengos a propiedad de la Iglesia. (A.M.M. C.R. 1314-1344, f. 28r).

Don Alfonso, por la gracia de Dios, rey de Castiella, de Toledo, de Leon, de Galizia, de Seuilla, de Cordoua, de Murçia, de Jahen, del Algarbe et sennor de Vizcaya et de Molina. Al conçejo de la çibdat de Murçia, salut et gracia.

Sepades que vi las petiçiones que me enbiastes con don Miguel de Rallad, vuestro vezino, seelladas con vuestro seello, en las cuales se contiene que me enbiastes dezir que auia muchos omnes et mugeres entre los que vendian casas et vinnas et tierras et çensales et otros heredamientos a elesia et a ordenes, et por esta razon que se menoscabauan los mis pechos et los mis derechos et que tomaua yo en ello grant deseruiçio et uos grant danno. Et que me pediades por merçed que mandase y lo que touiese por bien.

Porque vos mando, vista esta mi carta, que non consintades que ninguno venda hereditat regalenga, daqui adelante, a elesia nin a orden, nin a perlado nin a otro omne de orden por que el mio regalengo pase al abadengo, por que las mis rentas et los mios derechos menguen por esta razon, et sy alguno lo vendiere que ge lo tomedes et lo guardedes para fazer dello lo que la mi merçed fuere. Et non fagades ende al por ninguna manera.

Dada en Sepuluega, XII dias de enero, era de mill et trezientos et sesenta et cinco annos. Yo, Miguel Sanchez, la fiz escreuir por mandado del rey. Martin Dominguez. Ruy Martinez. Alfonso Yannez, vista. Gonçalo Rodriguez. Johan Gonçalez. Johan Rodriguez, registro.

LXXIV

1327-I-12, Sepúlveda. Provisión real de Alfonso XI al concejo de Murcia, ordenando que impidiesen la injerencia de jueces eclesiásticos en la justicia civil. (A. M.M. C.R. 1314-1344, f. 28r).

Don Alfonso, por la gracia de Dios, rey de Castiella, de Toledo, de Leon, de Gallizia, de Seuilla, de Cordoua, de Murçia, de Jahen, del Algarbe et sennor de Vizcaya et de Molina. Al conçejo de la çibdat de Murçia, salut et gracia.

